

LA VEIGA

La comarca lleonesa de La Veiga va dende les puertes d'Astorga a les de La Bañeza, una hermosa y amplia vega regada polos ríos Tuertu y Órbigu, y custodiada dende les altures poles ñeves cásiqes eternes del Telenu.

La primer Veiga de la Vía de la Plata

A poco más de dos kilómetros al este de Santiagomillas, corazón económicu del país de los maragatos, cambien la tierra y el paisaxe. Les fríes y ásperes llombes de La Somoza conviértense, de golpe, nuna amplia vega. Cambia l'arquitectura popular, los usos agrícolas y el trabayu tradicional de los sos habitantes.

Un cambiu tan desaxeráu que, tovía agora, pue alvertise. San Xusto de la Veiga, a malapenes otros dos kilómetros d'Astorga, tamién hacia l'este, tovía sigue calteniendo esta diferencia. Pero, onde dafechamente se muestra en tol so esplendor, ye entrando na vega pola so cabecera, les tierres de Valderréi, ente les agües del ríu Turienzu y la llinea de llombes que la separen de la comarca de la Valduerna.

El Camín de Santiago atraviésala, enantes d'entrar n'Astorga. La única gran población qu'alcontraba esta ruta dende la so salida d'Hospital d'Órbigu yera la de San Xusto de la Veiga. La Vía de la Plata crúzala entera, camín de La Bañeza, pela qu'hasta bien pocos años fueran les riques vegues agrícolas del ríu Tuertu.

A poco de dexar Santiagomillas, la belleza del paisaxe, verde y llanu (la tierra chana) llama poderosamente l'atención. La llinea del horizonte márquenla, al surueste, les ñeves del Telenu, y al norte los pequeños xerros de La Cepeda y l'Órbigu. La llarga alfombra verde dexa pasu, un poco más abaxu, aportando a Bustos y a Valderréi, a les primeres tierres de llabranza.

Con too, l'abandonu de la tierra ye xeneralizáu. Los campos ensin roturar, les sebes atacaes d'artos, los pueblos ensin xente, les cases derrumbaes, los caminos escaeciós. Y, too ello, a malapenes cinco kilómetros de l'autovía A-6 que xune Madrid con A Coruña. Y, too ello, al pie de poblaciones populoses como Astorga y La Bañeza, o como la mesma Riegu de la Veiga, en plena carretera Nacional-VI, agora venida a menos dende la inauguración de l'autovía. Un abandonu que se fai más bultable cuando vemos la recuperación de la vivienda maragata na comarca vecina o la declaración de Monumentu Nacional al pueblu de Santiagomillas.

La Veiga, con too, merez una visita. Dende'l puntu de vista de l'arquitectura popular, representa una zona de transición ente la piedra y l'adobe. Ente los sos vezos, tovía enforma enraigonaos ente los sos habitantes, consérvense los del conceyu abiertu, la facendeira, la veceira... asina como la particular celebración del antruexu.

Dende'l puntu de vista llingüísticu, atopámonos na última comarca hacia l'este que caltién los diptongos "ei" (veiga, facendeira...) y "ou" (outru), ente otros característiques propios del lleonés, como la "f inicial" (facer, fornu, filu...) o la "ll inicial" (llabu, lluna...). Rasgos que van desapareciendo pasu ente pasu a poco de pasar el ríu Órbigu. Ensin dexar de recordar que, estos rasgos propios del lleonés, malapenes s'adviercen na población más vieya del llugar, dexando constancia d'un retrocesu xeneralizáu en buena parte de Lleón.

La Vía de La Plata

Lo que conocemos como Vía de La Plata fue, dende época romana, la principal vía de comunicación del norueste peninsular. Orixinariamente serviría pa xunir les ciudaes de Mérida (Emérita Augusta) y Astorga (Astúrica Augusta).

Astorga convirtióse, a poco de la conquista romana, na "civitas" por escelencia. Convirtiéndose en pocos años nel principal centru económicu, políticu, administrativu y relixosu de tol área. D'ehí la só rápida conversión en ñudu de tolos caminos.

El principal d'ellos, la Vía de la Plata, nun yera l'únicu. Una ciudá romanizadora como Astorga necesitaba mantener buenas comunicaciones coles bases del so exércitu d'ocupación: la Legio VII Gémina (los raigaños de l'actual Lleón capital) y la Legio X Gémina (agües abaxo

del ríu Órbigu, cerca de la ciudá de Brigaecium, actual Benavente). Amás d'otra llarga serie de rutes menores, como la que la comunicaba con Lucus Augusti (anguañu Lugo), Bracara Augusta (agora Braga) y Lucus Asturum (nel centru d'Asturies, posiblemente Lluo de Llanera).

Una lápida funeraria, incrustada nel esquinal d'una paré de la ilesia de Villagarcía de la Veiga, da cuenta d'aquel tiempu. Conserva una inscripción dedicatoria d'un soldáu al so compañeru de cohorte, muertu.

El nome de Vía de la Plata deriva del árabe “ad lata” (el camín), nome que garró durante los años de dominación musulmana y que continuó siendo, a lo llargo de la Edá Media, la principal vía de comunicación ente les ciudaes de Mérida y Astorga. Hasta bien mediáu'l sieglu XIX, esta vía, transitada polos arrieiros y traxineiros maragatos, continuó siendo l'exe de comunicación ente'l norte y el sur d'España.

La importancia turística actual del Camín de Santiago, heriede del itinerariu medieval de pelerinaciones, orixinó la fiebre polos senderos de llargu recorriu n'España. Asina, la Vía de la Plata pasó a querer nacer en Xixón, en vez de n'Astorga, y a morrer en Sevilla, en cuentaes de Mérida. Los modernos folletos turísticos yá contemplan esta ampliación y, como ye mester, un esplicación hestórica bastante pelerina.

La comarca de La Veiga

Arrequexada ente comarques con una fuerte identidá, como La Maragateiría, La Cepeda o La Valduerna, la comarca de La Veiga, dafechamente despoblada, conserva interesantes rasgos propios.

Compónenla seis conceyos. Al norte, como abriéndose pasu ente l'Órbigu y Astorga, San Xusto de la Veiga. Regaos poles agües del Turienzu, los conceyos de Valderréi, Riegu de la Veiga y Santa María de la Isla. Y, los dos últimos, a orielles del Órbigu, San Cristóbal de la Polantera y Sotu de la Veiga.

La unidá del paisaxe en toos ellos ye manifiesta. El verde contrasta cola color de les tierres d'El Páramu, que s'alcuentren na más trespasar l'Órbigu pel únicu llugar posible, l'últimu pueblu de la comarca, Requeixu de la Veiga. Una diferencia que se marca per otra parte, como comentaba enantes, coles tierres de La Maragateiría, enforma más irregulares.

Sorprende, más que nada, el contraste con El Páramu. Toponímicamente, por exemplu. Los pueblos de la parte ueste del ríu, suelen llevar l'apellíu de la comarca: Seisón de la Veiga, Villamediana de la Veiga, Vecilla de la Veiga, el mesmu Sotu de la Veiga, Santa Colomba de la Veiga y el yá citáu Requeixu de la Veiga, na cuña que faen los ríos Órbigu y Tuertu. Una amuesa más de la verdá del refrán: les montañes xunen y los ríos separen.

Na tierra cultívense remolacha, pataca, fabes y cereales. Una buena tierra siempre mui bien cuidada y regada, arriendes de poles agües del Tuertu poles del Órbigu y les sos preses: el Moru, la Güerga Torina y el Canal Altu de Villares.

Les fabes fueran otrora d'una calidá escelente, pero agora malapenes se llanten más que pal consumu familiar. Vendíense pol so nome nos mercaos de Madrid, A Coruña o Uviéu, siendo mui apreciaes na ellaboración de la fabada asturiana.

La tierra sigue teniendo una gran importancia na vida diaria de los habitantes de La Veiga, por más qu'agora la mayor metada d'ellos trabaye nos pequeños talleres, fábricas y servicios de los alrededores d'Astorga. Esta importancia compruébase nos periodos de seca, que cuando son mui prrollongaos siguen moviendo a una llarga serie de procesiones rogatives a la Virxen, que suelen terminar nel vecín santuariu marianu de Castrotierra de la Valduerna, o procesionando dende ellí hasta la catedral d'Astorga.

Tovía agora, la matanza, vuelve a ser un buen momentu pa ver a les families alrededor de l'ancestral vezu. Yá ye tiempu de xelaes, lo que permite que cure aína la carne. Vienen a tener llugar ente San Martín y San Andrés, de primeros a finales del mes de payares. L'ambiente de la matanza ye festivu. El gochu siempre fuera una de les bases de la economía familiar y de l'alimentación.

El ritual ye'l propiu de toles tierres del norte. El día enantes nun se da de comer al gochu en tol día, de manera qu'al día siguiente tenga llimpiu'l butiellu. Los aperios propios del matarife y de los ayudantes tan dispuestos y ordenaos. Los glyayos del animal y les voces de

los qu'intervienen, indiquen a les clares qu'el sacrificiu dio apienzu. Del gochu too s'aprovecha. El sangre pa morcielles. El rau, churruscáu con paya, fai les delicies de los asistentes. Los buenos tastadores yá puen dicir: "Esti gochu va saber bien", o mal, según el paladar respuesta. Hasta la vexiga valía, más que val. Yera, convenientemente cosida ya hinchada, la rudimentaria pelota de los xuegos infantiles. El día depués de la matanza cominza'l despiece y los llabores pa enchorizar.

La vivienda ye la propia de transición ente la piedra, predominante yá na Maragateiría, y l'adobe, qu'amuesa les sos mayores espresiones en El Páramu. La casa tradicional, de la que malapenes queden exemplos en mui mal estáu de conservación, yera de dos plantes. El tapial de les paredes fue sustituyéndose, a lo llargo del sieglu XX y más hacia'l final, polos rebocos de cementu, posteriormente pintaos o encalaos.

Un gran portalón de madera da accesu a la vivienda, que tamién mira a la cai per grandes ventanales. Un d'ellos, el boqueirón, servía pa dar entrada a la paya pal ganáu, yá que la corte solía tar embaxo. Too ello, rematao por teya árabe, enxamás por llouxas de pizarra.

El xalé modernu ta acabando con esti tipu de vivienda tradicional. Un exemplu ye'l pueblu de Teyadinos, onde yá nun queda nengún teyáu en pie. Pocos tamién nel vecín pueblu de Teyaos. Como la vivienda, l'abandonu algama a los palombares y al restu de construcciones adicionales a la casa, como cortes y payares.

La desaparición del adobe y el tapial, elementos de construcción mui probes pero mui caracaterísticos de delles comarques lleoneses, ye una constante. La diferencia en comarques como ésta, o la vecina d'El Páramu, ente finales de los años setenta y agora, poco más de venti, ye enorme. Pueblu a pueblu compruébase como, al regresu de la emigración, principalmente a les mines asturianas, los fíos de los sos antiguos habitantes arreglaron les vieyes cases conservando poco más que l'espaci, convirtiendo en lladrillu lo que fuera tapial y en teya de cementu o uralita lo que fuera teya roxa.

Un cambiu que, daes les condiciones de vida d'entós, toos reconocen como necesariu y que sirvió pa meyorar la hixene y la dignidá de les persones. Lo que nun quita pa que, tamién, se piense que les autoridaes debieran tomar cartes nel asuntu y ponese a recuperar delles de les poques viviendes tradicionales que queden en pie como memoria etnográfica d'esta tierra y d'esta xente.

El folclor, y nesti casu a ritmu de jota, conserva perfectamente la memoria d'esta dependencia de la tierra: "Dícesme qu'eres mui ricu / y llabras con tres pareyas / y las mulas son prestadas / y las tierras son de renta".

La xente de La Veiga

A poco que se fale cola xente d'esta comarca una hestoria se repite ente los sos habitantes con respectu al so orixen: el de ser una comarca de repoblación. Un fenómenu ésti, que de ser ciertu, tien d'habese dao hai dalgo más de mil años, afáyase fundamente enraigón na creencia popular.

Documentalmente solo queda constancia de delles adxudicaciones de pumaraes per parte del Marqués d'Astorga nes tierres de San Cristóbal de la Polantera o del Conde de Luna en Posadiella de la Veiga. Otros llugares ñacieron vinculaos a órdenes militares, como fue la Hospitalaria de San Xuan de Xerusalén nel sitiu de San Román l'Antiguu.

Pero, esta conciencia de ser una tierra de repoblaciones estiéndese per tola vega del Órbigu. Asina entellácense hestories de repoblamientos mozárabes (que según dellos fueron éstos los que construyeron les primeres preses de riego, d'ehí qu'el nome d'una d'elles tovía conserve'l so orixen), como de soldaos d'otres partes d'Europa que vinieron a ayudar naquellos primeros años de la reconquista y que terminaron por convertise en vecinos del llugar por favor del señor cola concesión d'unes tierres.

Ésti ye probable que sea l'aniciu d'un topónimu como Polantera, que derivaría del de Puebla Entera. De manera que los vecinos d'estos llugares rexiríense por una Carta Puebla, como ocurriera en tantos otros llugares, y qu'equí sedría "entera", o sea que contaríen cola propiedá de la tierra y el derechu al nomamientu d'un alcalde y d'un xusticia, p'alministrar los bienes xenerales y facer cumplir les lleis y lo que dictare'l conceyu.



La figura del conceyu, o conceyu abiertu, pervive en buena parte de los pueblos de La Veiga. Tolos vecinos cuentan con voz y votu y suelen axuntase, como nel casu de Güerga de Garaballes, al toque de la campana.

En conceyu decídense munchos de los llabores comunales del pueblu y especialmente la facendeira y la veceira. La facendeira refier a los trabayos comunales acordaos en conceyu, como l'arreglu de los caminos y de les acequies, l'apagar los fueos o reteyar la ilesia. La veceira, que tamién se llama la vaqueira, ta, pola contra, cásique en completu desusu. Tratábase del nomamientu diariu d'un pequeñu grupu de persones pa llindiar el ganáu de tolos vecinos del pueblu, devolviéndolu a los sos respectivos dueños y llugares al finar la xera.

En fin, una tierra que, ensin escaecer del too los sos raigaños vinculaos a la tierra, de los que vien el propiu nome de La Veiga, amuesa los mesmos síntomas d'abandonu d'otres tierras cercanes. Los fíos de los que tuvieron que dise vuelven, pero la so relación cola tierra enxamás va volver a ser la mesma de los sos mayores.